

Waor of niet waor?

Dick van Bloemendaal, tekening Gerard Schut

Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Vur julie un vraag, mar vur mien un weet, welke wel of niet waor bin.

Dansles

In het begin van de vuuftuger jaoren begos Wim Vliek uut Niekark hier in Putten mit danslessen.

Dur waren wel veurweerden an verbunden : je mossen minstens zestien jaor wezen en un breefje van je ouweluu meebrengen waarop stung dat ze ut goed vunnen da'je leerde dansen. De lessen werden e'geuven in de grote zaol bie Cor Wilders, Op de Pol, hoek Achterstraot / Voorthuzerstraot en Karkstraot. Vliek dee dit samen mit z'n vrouw en as hulp had'ie Wim van Zoeren uut Niekarkerveen. Vliek gaf disse lessen naost z'n gewone wark. Hie warkte overdags bie de knopenfebriek in Niekark. Naost Putten gaven ze ok danslessen bie Cafee Lutmer in Niekark en bie Hotel Baars in Harderwiek.

Samen mit Aort van Boeijen, Garrut van de Pol, Riet Voois en Henny van Dompsele han we un leuke en gezellige groep, die van tied tot tied ok wel elders gungen dansen.

Jaoren laoter is Vliek ut vur z'n beroep gaon doen in de Kleterstraot in Niekark, waor'ie un mooie dansschool leut bouwen, en werden de lessen in Putten en Harderwiek e'stopt. De lessen begonnen in september en duurden twientug weken. Dur werd les e'geuven in de Foxtrot, de Weense wals en de Engelse wals. Tussen deur kregen we un paor danspassen van de Latijns Amerika dansen, zoas de Jife, de Rumba en de Tango. De Valeta was un dans die van tied tot tiet ok op ut programma stung. Mit de Karst was dur un balavond bie Hotel Baron in Harderwiek vur alle leden van de drie lokaties, en elke zaoterdagavond ko'je vrie dansen bij Cafee Lutmer in Niekark, waor veul gebruik van e'maakt werd.



Nao de twientugste les mos je ofdansen vur un diploma, je mosse dur dan keurug uutzien, in je zondagse pak en je kregen un doek mit un groot nummer op je rug e'speld. Zo trots as un hoend mit zeven

starten kwam je dan 's avons tuus mit je diploma. Ut was mien vierde diploma of getuugschrift in m'n leven : un getuugschrift van de zondagsschool en zwemdiploma's A en B. Mar ut meeste trots was ik op m'n dansdiploma, dat hadden niet veul jongeluu in die tied in Putten.

Nao oens trouwen bin m'n vrouw en ik weer samen bie Vliek op dansles e'weest, umdat we ut meeste vergeten waren in de leste jaoren.

+++